



INTRODUCZIUN

DA SUR MARTIN BEARTH

Gion Battesta ei in profet che fa veramein empaui tema e sterment. Gia sia vestgadira e bia dapli ses plails ussa en quei priedi als farisès e sadducès. «Razza da vipras» numna el quels, ils menaders e parsuras dil pievel. Ils farisès fuvan la partida religiusa e rigurusa, ils sadducès la partida politica plitost mundana. Gion Battesta pretenda dad els detschartamein conversiun, vul dir da midar patratg, midar veta.

Tgei di Gion Battesta era a nus, oz, a mi ed a ti? Tgei vein nus da midar, per che nossa veta semadiri e davanti sco buna salin? – Igl «Immanuel», il Diu cun nus, vegnius tier nus en Jesus, gidi nus a midar quei ch'ei da midar, per che nus seigien «spigias» madiras, cu El vegn per rimnar «sia salin en garner».

EVANGELI

Mt 3,1–12

¹Lezs dis ei Gion Battesta vegnius ed ha perdegau el desiert dalla Giudea schend: ²Midei patratg e seconverti, pertgei il reginavel da tschiel ei damaneivel. ³Da quel ha il profet Jesaja detg:

La vusch dad in che grescha el desiert:

Preparei la via dil Segner,

fagei uliv las sendas per el!

⁴Gion purtava in manti da peil camel ed ina tschenta da curom entuorn veta. Sia vivonda eran saleps e mèl selvadi. ⁵Tier el serendeven Jerusalem e tut la Giudea e l'entira cuntrada dil Jordan. ⁶Els seschavan battegiar dad el ellas auas dil Jordan e confessavan lur pucaus.

⁷Vesend che biars farisès e sadducès vegnevan tier il batten, di el ad els: Razza da vipras! Tgi ha mussau a vus da mitschar dalla gretta vognenta? ⁸Purtei fretgs che corrispundan alla conversiun.

⁹Buca tertgei: Nus vein Abraham per bab. Pertgei jeu ditgel a vus: Dieus ei el cass da leventar ord questa crappa affons per Abraham. ¹⁰La sigir ei gia fitgada ella ragisch dallas plontas. Mintga plonta che porta buca bien fretg, vegn derschida e bessa el fiug. ¹¹Jeu battegel vus cun aua per la conversiun.

Mo quel che vegn suenter mei, lez ei pli pussents che jeu. Jeu sun buca vengonzs da purtar ses calzers. El vegn a battegiar vus el Spert sogn ed el fiug. ¹²El tegn gia enta maun la pala e vegn a schubergiar siu iral da rudien. Sia salin vegn el a rimnar en garner, la paglia denton a barschar el fiug che stezza mai.